

Innuttaasunut, aalisartut, piniartut savaatillillu inuussutissarsiorlutik ingerlatsinerminni silap allanngoriartorneranut attuumassutilimmik ajunaarnersuarmut assingusumik eqqugaasut aningaasatigut ikiorserneqarnissaat siunertaralugu Naalakkersuisut Aningaasanut Inatsimmi kontumik nutaamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Kontomik pilersitsinerup peqatigisaanik kattuffiit attuumassuteqartut suliamut akuliutsinnerisigut ikiorsiisarnermik aaqquissuussinermut periusissanik aalajangersaanissamik Naalakkersuisut suliaqassapput, tamanna kontumi pingaarnermi oqaasertaliinikkut imaluunniit namminerisamik inatsisissatut siunnersuuteqarnikkut pissaaq.

(Inatsisartunut ilaasortaq, Agathe Fontain, Inuit Ataqatigiit)

Akissuteqaat

(Nunalerinermut, Imminut Pilersornermut, Nukissiutitut Avatangiisinullu Naalakkersuisoq)

Siullermeerneqarnera

Naalakkersuisut Inatsisartunut ilaasortaq Agathe Fontain, Inuit Ataqatigiit, aalajangiiffigisassatut siunnersuummut matumunnga qutsavigaat.

Naalagaaffiit Peqatigiit Silap pissusaanut ilisimasalittaasa martsimi ataatsimoortumik nalunaarusiartik saqqummiuppaat. Atuagaq nuannerpallaanngilaq. Nalunaarusiami erseqqissarneqarpoq ullumikkut iliuutsigut ukiuni untrilikkaani, allaammi siunissami ukiuni tuusintilikkaani sunnuteqartussaasut. Siunissami silap pissusii sakkortusissanngippata, inuussutissatigut ajornartuussanngikkutta pingortitamilu annaasaqassanngikkutta CO2-mik aniatitsinitsinnik annikillititsinissarput nukinginnarpoq.

Kalaallit Nunaanni ullumikkut inatsiseqarpoq, aalisartunut, piniartunut savaatilinnullu, ajunaarnersuarnut assingusunit eqqorneqartunut ikiorsiinissamut periarfissiisunik.

Aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut inatsisaat nr. 13, 3. december 2012-imeersoq naapertorlugu aalisartut piniartullu inuussutissarsiornermi sillimmasiinissamik piumasaqaateqarnermut ilaatinneqarput. Ullumikkut nunalerinermik suliallit piumasaqaammut tassunga ilaatinneqanngillat, kisiannili nunalerinermik suliallit aamma ilaalernissaat Naalakkersuisunit kissaatigineqarpoq. Sillimmasiissutit matussusiinnaatinnagit Naalakkersuisut toqqaannartumik eqqugaasunut immikkut ittumik tapersiissuteqarallarsinnaapput, tak. 2023-mut aningaasanut inatsimmi suliaqarfik 10-89-imut oqaasertaliussa q nr. 7. Tassani ajunaarnersuit ajutoornerillu ataatsimut pineqarput, taakkunungalu pingortitami ajunaarnersuit naatsorsuutiginnngisamillu pisut ajunaarnersuarmut assingusut allat ilaatinneqarput. Tassalu periarfissiinermut aamma ajunaarnersuit, silap pissusiata allannguutaannik peqquteqartut ilaatinneqarput.

Tamatuma saniatigut silap pissusaanik tunngavilimmik ajornakusoortunik pisoqartillugu annaasaqareernerme aallarteqqinnissamut tapersiisarneq *inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaat pineqartunut ilaatinneqarput.*

Aalisarneq piniarnerlu silap pissusaata allanngoriartorneranit ajornakusoortillugu imaluunniit inuussutissarsiorneq pisinnaanngippat, aalisartut piniartullu aningaasaqarnikkut ikiorserneqarnissamik qinnuteqarsinnaanerannut periarfissaq annertusiniarlugu inatsit nutarterneqaleruttorpoq. Allannguutissatut siunnersuummi assersuutigalugu tapiissutitut ilaatigut qimminut qimuttunut nerukkaatissanik pisiniartarnerup ilanngunnissaa sulissutigineqarpoq.

Allannguutissatut siunnersuutip UPA20024-mi Inatsisartunut saqqummiunneqarnissaa Naalakkersuisunit naatsorsuutigineqarpoq.

Matuma siuliani taaneqartunik oqaaseqarlutik Naalakkersuisut allannguutissatut siunnersuummik imaattumik saqqummiussipput:

Innuttaasunut, taakkunungalu aalisartut, piniartut nunalerinermillu inuussutissarsiutillit ilanngullugit, silap pissusiata allanngoriartorneranut attuumassutilimmik ajunaarnersuarmut assingusumik eqqugaasut aningaasatigut ikiorserneqartarnissaat siunertaralugu inuussutissarsiutigalugu aalisartut, piniartut nunalerinermillu suliaqartut aallarteqqinnissamut tapiiffigineqartarneri pillugit inatsimmik atuuttumik allannguinnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamatuma peqatigisaanik Naalakkersuisut suliniaqatigiiffiit eqqugaasut akuutillugit ajornartoornermi ikiorsiissutinut aaqqissuussinermi suleriaasissanik aalajangersarneqartunik siunnersuuteqarnissamut peqquneqassapput.